

西池謄稿

上卷

歲次己未秋日

風神價稿

奉天太古山房印

序

馬西池先生

諱瑤

林先世占復州籍童年負異材未弱

冠以經古受學使茹古香殿撰知得補博士弟子員謁
見之日謂先生曰耿介拔俗之姿瀟灑出塵之表子對
之可以無愧及壯遷於遼卜居衍水之北西岡之上築
鋤月山房朝夕吟咏其間家赤貧以課徒自給一時名
流多從之遊若愛博堂給諫壽伯清孝廉袁華峰明經
尤爲先生高第弟子先生以詩酒自豪得交韓紫庭進
士張繡江孝廉劉仙橋進士吟筒往來無虛日而先生

介弟西岡公自幼受先生教誨及長不名他師著有西岡詩草行世亦築小園名曰養花種菜之居兄弟互相唱和過其門者咸以雙丁二陸目之先生古近體詩學新城主文簡風韻逼肖而律賦試帖尤可與錢塘吳祭酒相伯仲惜學豐運蹇屢試京兆而未獲售僅以明經終老士論慨之其詩文著作遺稿無存長孫百貞稍有抄輯而於民國七年夏復爲狂瀾巨浸湮滅矣先生之歸道山在咸豐癸丑迄今近七十載吾邑學者咸欽先生爲人而以未得誦先生之詩爲憾今其曾孫承良肄

業於奉天省立第一師範學校年少聰穎於詩賦一道頗有會心觀其家藏西岡詩草久已付諸剗剗獨念先生遺稿散佚引爲深恨乃與其叔祖銘侯太學廣爲搜羅幸得此本於村塾蒙童之手篇第無存魯亥難免精心讐校稍復舊觀同校諸子均欲先觀爲快乃共籌巨資招工排印發潛德之幽光爲後學之津逮雖屬吉光片羽無異七尺珊瑚適楚藩授徒師校承良以簡首之辭來請楚藩與先生姪孫相皋茂才爲莫逆交於先生知之最詳乃不辭而爲之序時民國八年十月十日同

邑後學袁楚藩謹撰

先伯父西池公歿于咸豐三年春溥生于是年冬不獲
親承教誨侍奉顏色追恨曷極回憶垂髫入塾之年得
見家藏舊硯硯背銘曰噫此先兄西池手澤也授余以
癸丑暮春之初實星隕少微之前夕噫人磨硯耶硯磨
人耶噫一片心耶一片石耶歎曰西岡啣哀銘五字溥
讀斯銘不禁有感乃侍坐于先君之側請問先伯之學
問文章何無著作遺稿先君乃愴然曰汝伯長身削面
美髯鬚蘊藉風流篤尚氣節傑出秀吾宗矣工書法精
制藝一生心血盡銷磨於五七字中吾手鈔之冊爲友

人所失廣陵散恐謝絕人間矣如有藏稿擬刻者汝伯
定效方干地下清魂百拜語罷欷歔者久之博聞命之
下不勝恟惶年近弱冠忽于父執處見一殘編污損不
堪烟煤敗黑卷首有先君賞鑑之章朱色宛然細視之
乃先伯詩也急索之歸先君喜極欲狂適劉仙樵明府
聞知杖策蕭齋甫入門拈鬚而笑曰二西兄弟將合稿
矣無何底稿又失而合刻之舉遂寢豈文人之筆墨顯
晦無常耶計先伯之謝世迄今近七十年矣幸有孫曾
承良小子於村塾蒙童得一鈔本魯魚豕亥之訛實堪

笑倒承良請爲校正溥焚棄筆硯歷有年所午夜挑燈
敢不勉爲從事而落葉之難終屬不免九原有知亦應
責溥粗鄙不文也勘畢付承良集資排印暫爲存稿計
俟搜輯無遺再付梨棗至詩之品格賦之體裁高明白
能鑒賞溥何敢妄贊一辭姑爲叙原稿之顛末敬撰數
言以誌永感

中華民國八年十月十日胞姪樂溥頓首拜撰

西池賸稿卷一

遼陽馬瑤林西池草稿

古體詩

擬古詩十九首

攜手出郊郭揮手乃別離
妾居地之角君去天之涯日
暮悲風起思君君不知
寒虫懷春草倦鳥翔夕枝佇立
望道遠垂涕攬衣緩黃沙
暗千里家人何時返相送宛
如昨忽驚蕙蘭晚妾顏能長好
安惜青精飯

其二

荏苒東南風婀娜吹楊柳娉婷朱樓女綽約依軒牖
粲粲綺羅裳皎皎垂玉手郎爲冶遊子妾爲少年婦
空閨偏獨棲離思安能守

其三

九九高岡柏鬱鬱固磐石浮生能幾何天地一過客
有酒胡不樂人情亮非薄命僕駕言邁飛轡入京洛
一何綺車馬聯如索東馳銅駝街西驅金谷宅逶迤南
北宮樓臺數百尺遨遊恣心願曷爲自相迫

其四

置酒讌歡友笙歌雜前陳燕趙多妖冶歌舞妙傳神四
座識同願令德自有真援琴鳴一曲慷慨大志申一唱
庭過雲三歎梁飛塵人生具行樂寶筏渡迷津營營富
貴者滋味良苦辛

其五

高樓出塵表峨峨參天齊懸梯駕虹宇飛陛跨雲階中
有一佳人絃歌清且悲爲問歌者誰恐是韓憑妻此曲
安能顧臨風起徘徊一唱三歎息再唱七情哀不願傾
聽久但憐屬和稀思爲雙黃鵠振翮凌風飛

其六

上山採薜蘿下山採蘭草
采采不盈掬綿綿思遠道
故鄉歸不歸山高水浩浩
離居永已久沉憂令人老

其七

明月照庭隙蠨蛸挂簷壁
天漢橫高秋繁星皎歷歷
涼風吹岸柳吟蟬驚時易
仰視鴻雁飛嗷嗷安所適
憶昔同心人雲路展鵬翮
聲華富鐘鼎寒暄餘陳跡
織女弄機杼牽牛服轅輓
有名究無實出門望三益

其八

翩翩孤飛鳥戢翼南山阿中有松與柏上施薦與蘿總
角結婚時嫵婉兩相宜軒車望千里一水隔前陂相思
已將老相見何太遲譬如艷陽花幾朝生光輝昨傷春
梅飄今惜秋蘭萎願君崇令德妾又何怨爲

其九

晚畋饒芳蘭芬馨含碧滋薄言采其華感物懷所思惠
風吹我衣美人知何之持此欲誰贈難忘同心時

其十

西北望牽牛東南悵織女艷艷冶容姿盈盈顧空杼河

漢廣幾度佇立淚揮雨嗟我兩無緣悔不莫相許一年
一七夕渺渺人間語

其十一

客從邯鄲來驅馬洛陽道低徊荒臺下落日照秋草茫
茫千載事觸目催人老興廢良有定何苦爭遲早我身
亦如寄敢云延壽考生立三不朽自古奉爲寶

其十二

南山一何峻上與白雲屬嫋嫋秋風涼萋萋繁草綠寒
暑相迭更奄忽何其速客久歎時滯宦老悲年促胡爲

戀名利此日自相束洛陽嬌女兒顏容美如玉當窗理
紅妝撫琴奏清曲哀響馳高柱歌長節偏促四顧知音
稀徘徊展芳躅願爲雙飛鳥奮翼棲華屋

其十三

迴車東郭門驅馬北山墓古柏何離離蓬蒿沒荒路哀
哉九泉下昏昏長天暮陰陰自相循大夢何時寤夜悲
風前燭朝歎日中露人生亮非石安能壽永固求仙入
東海凡骨難超度學佛登西天俗緣適自誤但有聖賢
樂隨遇安吾素